

御製悅心集序

朕生平澹泊為懷。恬靜自好。樂天知命。
隨境養和。前居藩邸時。雖身處繁華。而
寢寐之中。自覺清遠閒曠。超然塵俗之
外。然不好放逸身心。披閱經史之餘。旁
及百家小集。其有寄興蕭閒。字懷超脫
者。佳章好句。散見簡編。或如皓月當空。

或如涼風解暑。或如時花照眼。或如好
鳥鳴林。或如泉響空山。或如鐘清午夜。
均足以消除結滯。浣滌煩蒸。令人心曠
神怡。天機暢適。目隨意採錄。若干則。置
諸几案間。以備觀覽。自總理萬歲以來。
宵旰不遑。求如曩時之怡情悅目。不可
復得。然寧靜之宰。不因物動。恬澹之致。

豈為境移。此乃可以自任者。爰取向所
採錄。彙為一書。名之曰悅心集。夫心者。
人之神明。所以為萬化之源。萬事之本。
而勞之則苦。擾之則煩。蔽之則昏。窒之
則滯。故聖賢有存心。洗心之明訓。佛祖
有明心。寤心之激立。吾非涵養一心之
沖虛靈妙。使無所累。與天地太和元氣。

渾然流行。無入而不自得也。如孔門之
春風沂水。仙家之吸露餐霞。如來之慧
雨香花。以及先儒之霽月光風。天根月
窟。其理同。其旨趣何異。同耶。是編所錄。
有莊語。有逸語。有清語。有趣語。有淺近
語。有深一語。人有仕。有隱。有儒。有釋。有
高名。有無名。亦不專一家。總之。戒貪。祛

妄。屏慮釋思。寄清淨心。遊歡喜地。玄近
招遠。祥簡味長。俯仰之間。隨時可會。然
而宣寂在境。而不宣。寂在寂者。自在心。性
往跡。寄清廊之鄉。而神思。紫綬。身受
塵氛之地。而志氣安舒。則見道未見道
之分也。昔朗禪師以書招永嘉禪師。山
居。師荅曰。未識道而先居山者。但見其

山。不見世道。未居山而先後道者。但見
其道。必忘其山。見道忘山者。人向之寐
也。見山忘道者。山中乃喧也。吾哉斯之。
知此義者。始可與談悅心集。

雍正四年丙午三月初三日御筆



悅心集卷一

樂志論

仲長統

使居有良田廣宅。背山臨流。溝池環帀。竹木周布。場圃築前。果園樹後。舟車足以代步涉之難。使令足以息四體之役。養親有兼珍之膳。妻孥無苦身之勞。良朋萃止。則陳酒肴以娛之。嘉時吉日。則烹羔豚以奉之。躊躇畦苑。遊戲平林。濯清水。追涼風。釣游鯉。弋高鴻。風於舞雩之下。詠歸高堂之上。安神閨房。思老氏之元虛。呼吸精神。求至人之彷彿。與達者數子。論道講書。俯仰二儀。錯綜人物。彈南風之

雅操發清商之妙曲。逍遙一世之上。睥睨天地之間。不受當時之責。永保性命之期。如此則可以陵霄漢。出宇宙之外矣。豈羨夫入帝王之門哉。

仲長統字公理。東漢末。山陽高平人。少好學。瞻文辭。

錄漢書疏廣傳 一則

廣既歸鄉里。曰。令家共具。設酒食。請族人故舊賓客。與相娛樂。數問其家金餘尚有幾。趣賣以共具。居歲餘。子孫竊謂其昆弟老人廣所愛信者。勸說君宜買田宅。廣曰。我豈老諄。不念子孫哉。顧自有舊田廬。令子孫勤力其中。足以

其衣食。今復增益之。以爲贏餘。但教子孫怠惰耳。賢而多財。則損其志。愚而多財。則益其過。且夫富者衆之怨也。吾旣亡以教化子孫。不欲益其過而生怨。又此金者。聖主所以惠養老臣也。故樂與鄉黨宗族共饗其賜。以盡吾餘日。不亦可乎。

按漢書疏廣字仲翁。東海蘭陵人也。漢地節中爲太子太傅。兄子受爲少傅。朝廷以爲榮。廣謂受曰。吾聞知足不辱。知止不殆。功遂身退。天之道也。遂上疏乞歸。許之。賜黃金二十觔。旣歸鄉里。云云。

歸去來辭

陶潛

歸去來兮。田園將蕪。胡不歸。旣自以心爲形役。奚惆悵而獨悲。悟已往之不諫。知來者之可追。實迷途其未遠。覺今是而昨非。舟搖搖以輕颺。風飄飄而吹衣。問征夫以前路。恨晨光之熹微。乃瞻衡宇。載欣載奔。僮僕歡迎。稚子候門。三徑就荒。松菊猶存。攜幼入室。有酒盈樽。引壺觴以自酌。眄庭柯以怡顏。倚南窗以寄傲。審容膝之易安。園日涉以成趣。門雖設而常關。策扶老以流憩。時矯首而遐觀。雲无心以出岫。鳥倦飛而知還。景翳翳以將入。撫孤松而盤桓。

歸去來兮。請息交以絕遊。世與我而相遺。復駕言兮焉求。
悅親戚之情話。樂琴書以消憂。農人告予以春及。將有事
於西疇。或命巾車。或棹孤舟。旣窈窕以尋壑。亦崎嶇而經
邱。木欣欣以向榮。泉涓涓而始流。善萬物之得時。感吾生
之行休。已矣乎。寓形宇內復幾時。曷不委心任去留。胡爲
乎遑遑欲何之。富貴非吾願。帝鄉不可期。懷良辰以孤往。
或植杖而耘耔。登東臯以舒嘯。臨清流而賦詩。聊乘化以
歸盡。樂夫天命復奚疑。

陶潛字淵明。或云字元亮。晉大司馬侃曾孫。潯陽柴桑

人也。宅邊有五柳樹。因以爲號。著五柳先生傳以自況。嘗爲彭澤令。屈於上官。曰。吾不能爲五斗米折腰。遂解組。賦歸去來辭。

桃花源記

陶潛

晉太元中。武陵人捕魚爲業。緣溪行。忘路之遠近。忽逢桃花林。夾岸數百步。中無雜樹。芳草鮮美。落英繽紛。漁人甚異之。復前行。欲窮其林。林盡水源。便得一山。山有小口。髣髴若有光。便捨船。從口入。初極狹。纔通人。復行數十步。豁然開朗。土地平曠。屋舍儼然。有良田。美池。桑竹之屬。阡陌

交通。鷄犬相聞。其中往來種作。男女衣著。悉如外人。黃髮垂髫。並怡然自樂。見漁人。乃大驚。問所從來。具答之。便要還家。設酒割鷄作食。村中聞有此人。咸來訊問。自云。先世避秦。率妻子邑人。來此絕境。不復出焉。遂與外人間隔。問今是何世。乃不知有漢。無論魏晉。此人一一爲具言所聞。皆歎惋。餘人各復延至其家。皆出酒食。停數日。辭去。此中人語云。不足爲外人道也。旣出。得其船。便扶向路。處處誌之。及郡下。詣太守。說如此。太守卽遣人隨其往。尋向所誌。遂迷。不復得路。後遂無問津者。

答人

陶弘景

山中何所有。嶺上多白雲。只可自怡悅。不堪持贈君。

陶弘景字通明。丹陽秣陵人。博學好養生。仕齊爲奉朝請。挂冠隱居茅山。性愛山水。每經澗谷。必吟咏盤桓。梁武帝旣早與之遊。及卽位。以手敕詔之。不出。然國家每有大事。必先諮之。時謂山中宰相。年踰八十而有壯容。

與顧章書

吳均

僕去月高尚還。覓薜蘿。梅溪之西。有石門山者。森壁爭霞。峭峰限日。幽岫含雲。深谿蓄翠。蟬吟鶴唳。水響猿鳴。英英

相雜。縣縣成韻。既素重幽居。遂葺宇其上。幸富菊花。偏饒竹實。山谷所資。於斯已辦。仁智所樂。豈徒語哉。

吳均。字叔庠。吳興人。梁奉朝請。

言志書

蕭大園

北山之北。南山之南。面修原而帶流水。倚郊甸而枕平臯。築蝸舍於叢林。構環堵於幽薄。近瞻煙霧。遠睇風雲。藉纖草以蔭長松。結幽蘭而援芳桂。仰翔禽於百仞。俯泳鱗於千尋。果園在後。開窗以臨花草。蔬圃居前。坐簷而看灌叻。二頃以供饘粥。十畝以給絲麻。侍兒五三。可充絰織。家僮

數四。足代耕耘。沽酪牧羊。協潘生之志。畜鷄種黍。應莊叟之言。穫菽尋汜氏之書。露葵徵尹君之錄。烹羔豚而介春酒。迎伏臘而俟歲時。披良書。探至蹟。可以娛神。可以散慮。有朋自遠。揚摧古今。田峻相過。劇談稼穡。斯亦足矣。

蕭大圓字仁顯。蘭陵人。隋開府儀同三司。

答馮子華書

王績

吾河渚間有先世田十五六頃。結構茅屋。并厨廐總十餘間。奴婢數人。足以應役。用天之道。分地之利。耕耘蔗蓰。黍稷而已。多養鳧雁。廣牧鷄豚。黃精白朮。枸杞薯蕷。朝夕採

掇以供服餌。牀頭素書數帙。莊老及易而已。每遇天氣晴朗。詠謝康樂詩。渺然盡陂澤山林之思。覺瀛洲方丈森然在目前。或時與舟子漁人。方潭並釣。俯仰極樂。戴星而歸。歌咏以會。意爲工。不必與悠悠閒人相倡和也。煙霞山水性之所適。暮春三月。登於北山。松柏羣吟。藤蘿翳景。意甚樂之。賞洽興闌。還歸河渚。蓬室甕牖。彈琴誦書。優哉游哉。聊以永歲。足下謂何如也。

王績字無功。文中子之弟。

攝生咏

孫思邈